



ქობულეთის მუნიციპალიტეტის საკრებულო

გ ა ნ კ ა რ გ უ ლ ე ბ ა N14

2021 წლის 29 იანვარი

ქ. ქობულეთი

ქობულეთის მუნიციპალიტეტში შინაური ცხოველების შენახვის წესის დამტკიცების შესახებ

საქართველოს ორგანული კანონის „ადგილობრივი თვითმმართველობის კოდექსის“ მე-16 მუხლის მეორე პუნქტის „რ“ ქვეპუნქტისა და საქართველოს ზოგადი ადმინისტრაციული კოდექსი“-ს 61-ე მუხლის შესაბამისად:

1. დამტკიცდეს ქობულეთის ტერიტორიაზე შინაური ცხოველების შენახვის წესი, თანახმად დანართისა.

2. დამტკიცებული წესების დარღვევისათვის საქართველოს ზოგადი ადმინისტრაციული კოდექსის 171-ე მუხლის მე-5 პუნქტის შესაბამისად საჯარო სასჯელი განისაზღვროს ყოველი ქმედებისათვის ფიზიკურ პირებზე 50 ლარით, ხოლო იურიდიულ პირებზე 200 ლარით.

3. ქობულეთის მუნიციპალიტეტის მერიამ უზრუნველყოს:

ა) ქობულეთის მუნიციპალიტეტის ტერიტორიაზე შინაური ცხოველების შენახვის წესების მოსახლეობისათვის ფართო პროპაგანდა;

ბ) შესაბამის კომპეტენტურ ორგანოებთან ერთად ამ გადაწყვეტილებით მიღებული წესების შესრულების კოორდინაციისა და კონტროლის განხორციელება;

გ) დაჭერილი უმეტესწილად, მოხეტიალე შინაური ცხოველებისათვის განთავსებისათვის სპეციალური ადგილის გამოყოფის თაობაზე შესაბამისი წინადადებები შემუშავდება შესაბამის იურიდიულ პირთან ერთად;

დ) დაჭერილი ცხოველების კვებით უზრუნველყოფისა და მათი შენახვის ხარჯების შესახებ წინადადებების შემუშავება და წარდგენა განხორციელდება შესაბამის იურიდიულ პირთან;

ე) ეთხოვოს ქობულეთის მუნიციპალიტეტის მერიას საქართველოს მთავრობის 2020 წლის 22 სექტემბრის N1838 განკარგულების შესაბამისად კომპეტენციის ფარგლებში, უზრუნველყონ მოსახლეობაში ცოფის დაავადების მიმართ ცნობიერების გაზრდის მიზნით საინფორმაციო კამპანიების ჩატარება;

3. ამ განკარგულების ძალაში შესვლისთანავე ძალადაკარგულად გამოცხადდეს ქობულეთის მუნიციპალიტეტის საკრებულოს 2015 წლის 20 მარტის N32 განკარგულება;

4. კონტროლი განკარგულების შესრულებაზე დაევალოს ქობულეთის მუნიციპალიტეტის საკრებულოს თავმჯდომარის მოადგილეს (ნ.თხილაიშვილს);

5. განკარგულება შეიძლება გასაჩივრდეს ერთი თვის ვადაში ბათუმის საქალაქო სასამართლოში (მის: ქ. ბათუმი, ზუბალაშვილის ქ. №30);

6. განკარგულება ძალაშია ხელმოწერისთანავე.

საკრებულოს თავმჯდომარე



დ.მჭედლიშვილი

**ქობულეთის მუნიციპალიტეტის ტერიტორიაზე შინაური ცხოველების
შენახვის წესის შესახებ**

1. ეს წესი ვრცელდება ქობულეთის მუნიციპალიტეტში იმ ფიზიკურ და იურიდიულ პირებზე, რომლებსაც საკუთრებაში ან მფლობელობაში ჰყავთ ძაღლი, ძროხა, ღორი ან სხვა შინაური ცხოველი (შემდგომში-ცხოველი).

შენიშვნა: იურიდიული პირი – ქობულეთის მუნიციპალიტეტის მერიის მიერ განსაზღვრული იურიდიული პირი, რომელიც წესდების საფუძველზე განახორციელებს ამ განკარგულებით განსაზღვრულ საქმიანობას.

საკურორტო ზოლი - ზღვის სანაპირო ზოლი და ქალაქის პირველი და მეორე ზონა.

2. ქ.ქობულეთში ცხოველების შენახვა შესაძლებელია მხოლოდ სპეციალურად იზოლირებულ ტერიტორიაზე (კარგად შემოღობილი ეზოები, ნაკვეთები და სხვა) ან დაბმულ მდგომარეობაში, მოვლა-შენახვის წესების, ზოოჰიგიენური და ვეტერინარულ სანიტარული ნორმების სრული დაცვით.

3. ცხოველების მესაკუთრეები (მფლობელები) ვალდებული არიან:

ა) არ დაუშვან ცხოველების გაშვება იზოლირებული ტერიტორიის ფარგლებს გარეთ, ქალაქის ქუჩებში, სკვერებში, პარკებში და სხვა საზოგადოების თავშეყრის ადგილებში. ძაღლების გასეირნება ქალაქის ტერიტორიაზე დასაშვებია მხოლოდ მოკლე საბმელისა და ალიკაპის გამოყენებით.

ბ) მკაცრად დაიცვან ცხოველების შენახვის წესები, უზრუნველყონ გარემომცველ პირთა უსაფრთხოება და არ დაუშვან ცხოველების მიერ საერთო სარგებლობის ადგილების დაზინძურება, ნარგავების დაზიანება, აგრეთვე ცხოველებისათვის არაკეთილსაიმედო (ანტისანიტარული) პროდუქტების გამოყენება ქალაქის ტერიტორიაზე არსებული სხვადასხვა ნარჩენების სახით;

გ) ცხოველების ტრანსპორტით გადაყვანისას უზრუნველყონ მოქალაქეთა უსაფრთხოების წესების დაცვა;

დ) ისარგებლონ ვეტერინარიის სამსახურის სათანადო კონსულტაციებით ამ განკარგულებისა და ცხოველთა შენახვის წესების შესრულებასთან დაკავშირებით.

ე) უზრუნველყონ შინაური, ხორცისმჭამელი ცხოველების (კატა, ძაღლი) სავალდებულო (ცოფის) ვაქცინაცია.

4. მოხეტიალე, უმეთვალყურეო ან/და უპატრონოდ მყოფი ცხოველები საკურორტო ზოლში ექვემდებარებიან დაუყოვნებლივ დაჭერასა და იზოლაციას.

5. მოსამსახურე იურიდიული პირი საკურორტო ზოლში უმეთვალყურეოდ, უპატრონოდ გაშვებული ცხოველების დაჭერის შემთხვევაში მათ ათავსებს სპეციალურად გამოყოფილ ადგილას და უზრუნველყოფს არაუმეტეს ხუთდღიან სათანადო კვებას.

6. დაჭერილი ცხოველების მესაკუთრე, მფლობელი ვალდებულია შესაბამის იურიდიულ პირს მიაკითხოს ცხოველის დაჭერის შესახებ შეტყობინების მიღებისთანავე, მაგრამ არაუგვიანეს ხუთი კალენდარული დღისა და წარუდგინოს ცხოველის მფლობელის დამადასტურებელი დოკუმენტი ან სხვაგვარად დაასაბუთოს საფუძვლიანობა.

7. უმეთვალყურეო ცხოველის დაჭერისთანავე, სანამ განხორციელდება მისი გადაყვანა დანიშნულების ადგილას, მესაკუთრე/მფლობელის მიერ ცხოველის დაბრუნების მოთხოვნით მომართვის შემთხვევაში იგი თავისუფლდება ჯარიმის გადახდისაგან, წინააღმდეგ შემთხვევა მას ცხოველი უბრუნდება მხოლოდ დაწესებული ჯარიმის გადახდის დამადასტურებელი დოკუმენტის წარმოდგენის საფუძველზე.

8. თუ დაჭერილი ცხოველის მესაკუთრე ცხოველის დაჭერიდან 5 დღის ვადაში არ გამოცხადდება მომსახურე იურიდიულ პირთან ან გამოცხადდება ცხოველის დაბრუნების მოთხოვნით, მაგრამ არ გადაიხდის საჯარიმო თანხას, ასეთ დროს მოსამსახურე იურიდიულ პირს უფლება აქვს მოქმედი კანონმდებლობით დადგენილი წესით უზრუნველყოს ცხოველის რეალიზაცია და ამგვარად საჯარიმო თანხის ამოღება.

9. დაჭერილი ცხოველის რეალიზაციის შემთხვევაში (იურიდიული პირი) ვალდებულია დაუბრუნოს თანხა ცხოველის მესაკუთრეს იმ ოდენობით, რაც აღემატება საჯარიმო თანხების საერთო ოდენობას, იმავე დროს იურიდიულ პირს უფლება აქვს ცხოველის მესაკუთრეს, მფლობელს

კანონით დადგენილი წესით მოთხოვოს თანხა იმ ოდენობით რა ოდენობითაც ნაკლებია ცხოველის რეალიზაციიდან მიღებული თანხა საჯარიმო თანხის საერთო ოდენობაზე.

10. ქობულეთის მუნიციპალიტეტის ტერიტორიაზე შინაური ცხოველების შენახვის წესების დარღვევისათვის საქართველოს ზოგადი ადმინისტრაციული კოდექსის 171-ე მუხლის მე-5 პუნქტის შესაბამისად საჯარიმო სანქციები განისაზღვრება ყოველი ქმედებისათვის ფიზიკურ პირებზე 50 ლარით, ხოლო იურიდიულ პირებზე 200 ლარით.